



Broj/Број: 01/2а-50-1-2-17/07
Sarajevo/Сарајево, 30.11.2007.

ZAPISNIK

17. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 30.11.2007. godine

Sjednica je počela u 13 sati i vodio ju je predsjednik Komisije Slavko Matić.

Sjednici su prisustvovali sljedeći članovi Komisije: Slavko Matić, Denis Bećirović, Sadik Ahmetović, Sefer Halilović, Husein Nanić, Azra Alajbegović.

Zapisnik su vodile Isović Lejla i Mirjana Brčkalo - student stažista Nacionalnog Demokratskog Instituta.

Opravdano odsutni su bili Milorad Živković, Milica Marković i Azra Hadžiahmetović.

Sjednici su prisustvovali i pozvani gosti i predstavnici predlagača: Radomir Bogdanović, ispred Ministarstva vanjskih poslova BiH te Lejla Solunović ispred Ministarstva sigurnosti BiH.

Ova sjednica Komisije, sa samo dvije tačke dnevnog reda, je sazvana **usmeno**.

DNEVNI RED

- 1) Davanje suglasnosti za ratificiranje Sporazuma između Bosne i Hercegovine i Evropske zajednice o olakšicama kod izdavanja viza. Sporazum je potpisao g. Tarik Sadović, ministar sigurnosti Bosne i Hercegovine 18. septembra 2007. godine u Briselu.
- 2) Davanje suglasnosti za ratificiranje Sporazuma između Bosne i Hercegovine i Evropske zajednice o readmisiji lica koja borave bez dozvole. Sporazum je potpisao g. Tarik Sadović, ministar sigurnosti Bosne i Hercegovine 18. septembra 2007. godine u Briselu.

Ad.-1. Davanje suglasnosti za ratificiranje Sporazuma između Bosne i Hercegovine i Evropske zajednice o olakšicama kod izdavanja viza;

Predsjedatelj Komisije za vanjske poslove g. Slavko Matić, dao je uvodno izlaganje povodom oba Sporazuma.

Potom se za riječ javio g. Denis Bećirović sa prijedlogom da se na narednoj sjednici Komisije kao prva tačka dnevnog reda pojavi: „**Razmatranje međunarodnih posjeta članova Komisije sa posebnim osvrtom na kriterij odabira i način odlučivanja o sastavu članova.**“ Također je dodao da su članovi Komisije, kao i sami zastupnici, apsolutno neinformirani o ovim činjenicama, te da je svakako potrebno stvari poredati na principijelan način (utvrditi koji su to kriteriji koji se uzimaju u obzir, ko od članova Komisije kao i samih zastupnika putuje, kao i ostali podaci...). Izrazio je zabrinutost zbog činjenice da članovi Komisije za vanjske poslove imaju manje posjeta međunarodnog karaktera nego ostali u Parlamentarnoj skupštini BiH.

G. Husein Nanić, je podržao ovaj prijedlog, kako bi se konačno uveo red u međunarodnoj oblasti.

Konsenzusom je donesen zaključak da se ova tačka dnevnog reda pripremi za iduću sjednicu, ukoliko to bude period duži od 7 dana.

Predsjedatelj Komisije je na početku rasprave o davanju suglasnosti za ratificiranje ova dva sporazuma zamolio Radomira Bogdanovića da iznese mišljenje MVP-a BiH o pravnoj valjanosti ovih dokumenata. Izvjestilac iz nadležnog ministarstva je naveo da je provedena kompletna zakonske procedura. Potom je dodao kako je Evropska zajednica od zemalja u tranziciji zahtijevala potpisivanje ovih Sporazuma. Oba ugovora je potpisao g. Tarik Sadović, ministar sigurnosti BiH 18. septembra 2007. godine. Uz to je dodao da su Sporazumom između BiH i Evropske Zajednice proširene vizne olakšice u korist naših građana te da ovaj Sporazum svakako predstavlja jedan od segmenata za liberalizaciju viznog režima.

Lejla Solunović, izvjestilac iz Ministarstva sigurnosti BiH se potom javila za riječ. U pogledu Sporazuma između Bosne i Hercegovine i Evropske zajednice o readmisiji lica koja borave bez dozvole navela je kako ovaj Sporazum sadrži tipične odredbe i to: obaveze BiH u vezi sa readmisijom, obaveze Evropske zajednice, procedura readmisije, operacije tranzita, troškovi, zaštita podataka i klauzula o nepostojanju utjecaja, implementacija i primjena...itd. A kada se tiče Sporazuma između Bosne i Hercegovine i Evropske zajednice o olakšicama kod izdavanja viza, striktno je naglasila da će naknada za obradu viza koštati 60 EURA, a ne 30 EURA, kao kazna, ukoliko danas ne dođe do potpisivanja Sporazuma.

Član Komisije za vanjske poslove, g. Bećirović, je nadalje iznio svoje mišljenje o neodgovornom odnosu Predsjedavajućeg Vijeća Ministara, g. Nikole Špirića, prema građanima BiH. Podsjetio je da se neko očito poigrava sa elementarnim pravima građana, te će zbog nečije neodgovornosti možda vize koštati duplo više nego do sada.

G. Nanić je istakao kako se ne smiju sklapati oči od krize u koju je zapala BiH, Naime, po njemu Komisija treba izaći sa jedinstvenim stavom o ovom problemu.

Izvjestiocu iz Ministarstva sigurnosti BiH, postavio je pitanje g. Bećirović, u smislu da li postoji neka kalkulacija šta će se dogoditi i koliko će to koštati građane BiH za ovaj mjesec dana, ukoliko danas ne dođe do potpisivanja ova dva Sporazuma. Gđa Solunović nije raspolagala sa ovakvim podacima te nije mogla odgovoriti na ovo pitanje.

Komisija je na ovoj sjednici donijela sljedeći zaključak koji se upućuje Vijeću ministara BiH:

- Komisija za vanjske poslove izražava nezadovoljstvo sporošću u procesu od potpisivanja Sporazuma između Bosne i Hercegovine i Evropske zajednice o olakšicama kod izdavanja viza, do ratifikacije, čime su građani dovedeni u poziciju da će u slučaju neblagovremene ratifikacije Sporazuma, biti prisiljeni plaćati dvostruke troškove za dobijanje viza.
- Komisija za vanjske poslove traži kompletnu informaciju o procesu od potpisivanja Sporazuma između Bosne i Hercegovine i Evropske zajednice o olakšicama kod izdavanja viza, 18. septembra. 2007. godine, do danas.

Predsjedatelj g. Slavko Matić, je predložio da se da suglasnost za ratificiranje Sporazuma između Bosne i Hercegovine i Evropske zajednice o olakšicama kod izdavanja viza kao i Sporazuma između Bosne i Hercegovine i Evropske zajednice o readmisiji lica koja borave bez dozvole. **Svi članovi Komisije su bili za.**

Sjednica je završila svoj rad u 14 sati.

SEKRETAR
KOMISIJE ZA VANJSKE POSLOVE
Merdžana Iglica

PREDSJEDNIK
KOMISIJE ZA VANJSKE POSLOVE
Slavko Matić

Kopija: MVP-u BiH